

Maybank IB jangka ekonomi Malaysia berkembang 4.0 peratus pada 2023

Bernama

Januari 5, 2023 18:28 MYT

KUALA LUMPUR: Maybank Investment Bank Bhd (Maybank IB) menjangkakan Keluaran Dalam Negara Kasar (KDNK) Malaysia berkembang pada kadar yang lebih perlahan sebanyak 4.0 peratus tahun ini berikutan pertumbuhan ekonomi global yang agak sederhana, penggunaan swasta yang rendah dan peningkatan inflasi.

Ketua Ahli Ekonomi Suhaimi Ilias berkata pertumbuhan sederhana tahun ini disokong oleh petunjuk berfrekuensi tinggi seperti Indeks Pengurus Pembelian (PMI) pembuatan bagi Malaysia, yang telah merosot lebih rendah sejak suku keempat 2022 termasuk trend pertumbuhan import dan jumlah eksport yang pada dasarnya menyederhana dengan ketara dalam tempoh yang sama.

Bagaimanapun, pengeluaran lebih simpanan yang telah dibangunkan sejak 2020 di tengah-tengah sekatan pergerakan serta langkah rangsangan ekonomi seperti pemberian tunai, bantuan kewangan dan skim pengeluaran Kumpulan Wang Simpanan Pekerja (KWSP) bernilai RM145 bilion, akan menyediakan penampakan serta sokongan bagi pertumbuhan perbelanjaan pengguna.

"Isu utama yang menjejaskan prospek ekonomi tahun ini ialah persekitaran inflasi dan kadar faedah yang lebih tinggi yang akan menjejaskan pertumbuhan ekonomi.

"Tetapi terdapat mitigasi ke atas risiko penurunan kepada pertumbuhan dan mungkin menghalang ekonomi daripada mengalami kemelesetan termasuk polisi monetari (pendirian) Bank Negara Malaysia (BNM) yang pada dasarnya beralih daripada akomodatif kepada neutral dan tidak ketat, serta ketersediaan simpanan berlebihan dalam ekonomi yang sedang dikeluarkan untuk mengekalkan perbelanjaan domestik," katanya pada taklimat media maya mengenai prospek pasaran 2023 hari ini.

Suhaimi menjelaskan kenaikan 25 mata asas (bps) lagi kepada 3.0 peratus dalam kadar dasar semalaman (OPR) oleh BNM bulan ini, mengembalikan kadar itu ke tahap sebelum pandemik.

Beliau berkata inflasi termasuk kadar faedah yang tinggi akan memberi kesan ke atas kos sara hidup dan pendapatan boleh guna sebenar sambil mengunjurkan perbelanjaan pengguna mungkin perlahan kepada 6.0 peratus pada tahun ini berbanding 11.5 peratus yang direkodkan tahun lepas.

Sebaliknya, pemulihan dalam kemasukan pelancongan, disokong oleh permintaan terpendam yang berterusan sejak tahun lepas serta pembukaan sempadan China, jumlah perbelanjaan modal yang menggalakkan dan pelaburan sektor swasta yang diluluskan yang dijangka tahun ini akan memberikan sokongan kukuh kepada ekonomi Malaysia.

Suhaimi ketika mengulas mengenai pembentangan Bajet 2023 berkata kebimbangan pengundi terhadap kos sara hidup seperti makanan dan perumahan mampu milik, penambahbaikan perkhidmatan awam, pengangkutan, pendidikan dan penjagaan kesihatan perlu ditangani.

Terdapat juga keperluan untuk belanjawan itu diteliti bagi membawa pertumbuhan serta pembangunan yang lebih saksama di seluruh negara, terutamanya negeri-negeri yang kurang maju, supaya tiada pihak yang akan ketinggalan, katanya.

Menjawab soalan mengenai Cukai Barang dan Perkhidmatan (GST), Suhaimi menjelaskan pengenalan sebarang sistem cukai baharu bukan merupakan idea yang baik sekarang ini, memandangkan rakyat sedang terkesan dengan kos sara hidup yang lebih tinggi, terutamanya barangan keperluan, di tengah-tengah kenaikan kadar faedah.

"Sebarang hasil tambahan yang diperlukan kerajaan boleh datang daripada hasil bukan cukai dan pada dasarnya ia bergantung kepada dividen Petronas," katanya.

Perdana Menteri Datuk Seri Anwar Ibrahim yang juga Menteri Kewangan dijadual membentangkan Belanjawan 2023 di Dewan Rakyat pada 24 Feb 2023 semasa Mesyuarat Sulung Penggal Pertama Parlimen Ke-15.